

四庫全書薈要

• 乾隆御覽本

集部

欽定四庫全書薈要

集部

東坡全集卷六十八

九

詳校官助教

臣常循




東坡全集卷六十八

宋蘇軾撰

表狀四十二首

謝除龍圖閣學士表二首


臣軾言伏蒙聖恩以臣累章請郡特除臣龍圖閣學士

知杭州者中禁寶儲上應奎壁之象先朝謨訓遠同河
洛之符隸職其間省躬非據臣軾誠惶誠恐頓首頓首
伏念臣學非有得愚至不移雖叨過實之名卒無適用

之器少時妄意蓋嘗有志於事功晚歲積憂但欲歸安
於田畝屬聖神之履運荷識拔之非常猶冀桑榆之收
遽迫犬馬之疾力求閒散庶免顛擠豈謂皇帝陛下聖
度包荒天慈委照察其才有所短不欲強置之禁嚴知
其進不由人故特保全其終始遂加此職以責其行臣
敢不仰緣末光益勵素守往何之而不可中無愧之為
安但未死亡必期報塞臣無任感天荷聖激切屏營之
至

又

臣軾言伏蒙聖恩以臣累章請郡特除臣龍圖閣學士知杭州者北扉清密久愧素餐內閣深嚴復膺殊寵以榮為懼有醜在顏臣軾誠惶誠恐頓首頓首伏念臣賦命數奇與人多忤遭遇仁祖忝竊賢科繼蒙英廟之深知尤荷裕陵之見器而流離若此窮薄可知晚親日月之光常恐餅壘之溢故求閑散以避災眚豈謂太皇太后陛下天高聽卑坤厚載物愛惜臣下固無異於子孫

委任官師本不分於中外致茲衰病不失清華然臣辭寵而益榮求閑而得劇雖云稍遠於爭地尚恐終非其久安敢不磨鈍自修履冰知戒庶全孤節少答殊私臣無任

謝賜對衣金帶馬表二首

臣軾言伏蒙聖慈特賜衣一對金腰帶一條金鍍銀鞍轡一副馬一匹者出笥之珍已華朽質解驂之賜益耀衆觀顧惟何人亦被茲寵臣軾誠惶誠恐頓首頓首伏

念臣少而拙訥老益疎愚山野之姿非文繡之所及疲
駑之質雖鞭策以何加方祈冗散之安更忝便蕃之錫
此盖伏遇皇帝陛下緝熙儒術罔羅人材不愛車服寵
數之章使為吏民瞻望之美據鞍有愧束衽知榮敢不
奉以牧民永思去害之措施之大邑庶無學製之傷臣
無任

又

臣軾言伏蒙聖恩特賜衣一對金腰帶一條金鍍銀鞍

轡一副馬一匹者命服斯皇詩詠周宣之德康侯用錫

易稱王母之仁惠澤所加臣工知勸臣軾誠惶誠恐頓

首頓首伏念臣資材朽鈍學術空疎矧茲衰病之餘豈

復光華之美荷寵章之蕃庶人以為榮顧形影之支離

臣惟自愧此蓋伏遇太皇太后陛下知人堯哲徧物舜

仁時遣拾遺補過之臣出為承流宣化之任子衣安吉

不待請而得之我馬虺隤蓋知勞而賜者敢不勉思忠

盡務報恩勤永惟廐庫之珍莫非民力無忘獄市之寄

以副上心臣無任

笏記二首

臣軾言隸職宸居承流閭寄自知衰朽有玷寵光此蓋
伏遇皇帝陛下總攬羣材靡遺片善曲收頑鈍迭處清
華徒傾草木之心莫報乾坤之施臣無任

又

既塵美職復玷名藩榮寵過情省循知愧此蓋伏遇太
皇太后陛下仁均動植明燭幽微特示寵章以旌眷遇

恩勤莫報生死難忘臣無任

杭州謝上表二首

臣軾言伏奉制書除臣龍圖閣學士知杭州臣已於今
月三日到任上訖者始衰而病豈非滿溢之災乞越得
杭又過平生之望臣軾誠惶誠恐頓首頓首伏念臣起
自廢黜驟登禁嚴畢命驅馳未償萬一懷安退縮豈所
當然蓋散材不任於斧斤而病馬空糜於芻粟故求外
補以盡餘年豈期避寵而益榮求閑而得劇此蓋伏遇

皇帝陛下剛健中正緝熙光明無為蓋虞舜之仁篤學
有仲尼之智而臣猥以末技日奉講帷凜然威光近在
咫尺惟古人責難之意每不自量方陛下好問之初遽
以疾去推之理數可謂奇窮荷眷遇之不移竊恩榮而
愈重雖雨露之施初不擇物而犬馬之報期於殺身臣
無任

又

臣軾言伏奉制書除臣龍圖閣學士知杭州臣已於今

月三日到任上訖者入奉榮嚴出膺方面皆人臣之殊
選在儒者以尤榮臣軾誠惶誠恐頓首頓首伏念臣受
寵逾涯積憂成疾既思退就於安養又欲少逃於滿盈
仰荷至仁曲從微願江山故國所至如歸父老遺民與
臣相問知朝廷輟近侍為太守蓋聖主視天下如一家
鞭扑未施爭訟幾絕臣之厚幸豈易名言此蓋伏遇太
皇太后陛下天地之仁賢愚兼取日月之照邪正自分
每包函其蠢迂欲保全其終始兄弟孤立嘗親奉於德

昔死生不移更誓堅於晚節臣無任

杭州謝放罪表二首

臣軾言臣近以法外刺配本州百姓顏章顏益二人上
章符罪奉聖旨特放罪者職在承宣當遵三尺之約束
事關利害輒從一切之便宜曲荷天慈不從吏議臣軾
誠惶誠恐頓首頓首伏念臣早緣剛拙屢致憂虞用之
朝廷則逆耳之奏形於言施之郡縣則疾惡之心見於
政雖知難每以為戒而臨事不能自回苟非日月之明

肝膽必照則臣豈惟獲罪於今日久已見傾於衆言恭惟皇帝陛下睿哲生知清明旁達委任羣下退託於不能愛養成材惟恐其有過知臣欲去一方之積弊須除二猾以示民特屈憲章以全器使臣敢不省循過咎祇服簡書眷此善良自不犯於漢法時有貸捨用益廣於堯仁臣無任

又

亂羣之誅不請而決蓋恩威之無素致奸猾之敢行方

俟譴訶豈期寬宥臣軾誠惶誠恐頓首頓首伏以法吏
網密蓋出於近年守臣權輕無甚於今日觀祖宗信任
之意以州郡責成於人豈有不擇師帥之良但知繩墨
之馭若平居僅能守法則緩急何以使民顧臣不才難
以議此恭惟太皇太后陛下寬仁從衆信順得天推一
身之至公納萬方於無罪而臣始終被遇中外蒙恩謂
事有專而合宜情無他而可恕故加貸捨以示寵綏朝
廷之明粗以臣為可信吏民自服當不令而率從臣無

任

賀明堂赦書表二首

臣軾言宗祀告成修累朝之盛典端門肆青荅萬宇之歡心凡有識知舉增抃躍臣軾誠歡誠喜頓首頓首竊謂祖宗恩信之所被譬如天地寒暑之不差將推作解之仁必在當郊之歲恭惟皇帝陛下憲章六聖左右三靈上帝眷而風雨時壬人去而蠻夷服講明大禮對越昊天懷柔百神嚮用五福大河修復奏軌道於東流藩

邨顧懷錫鴻名於西府臣備貢法從待罪守臣想聞路
寢之鼓鍾曾叨奉引嘉與海隅之草木同被恩私臣無
任

又

臣軾言嚴配禮成民心知孝好生德洽天下歸仁凡蒙
一洗之恩舉有惟新之喜臣軾誠歡誠忭頓首頓首伏
以功存廟社而辭其禮德及草木而諱其名此聖人之
所難幸微生之親見恭惟太皇太后陛下勲高任姒道

配唐虞顧惟致治於和平孰不歸心於保佑合宮均福
畢修累聖之文會慶告成不居先后之位臣職叨禁從
身遠闕庭既欣渙汗之私溥霑動植更喜謙光之美獨
冠古今臣無任

謝賜厯日詔書表二首

臣軾言伏蒙聖恩特賜臣詔書并元祐五年厯日一卷
者論道調元雖大臣之職授時賦政亦郡守之常而臣
供奉內朝使指一道居則代言而頒令出則勸民以務

農蒙此恩榮敢忘奉順臣軾

中謝

恭惟皇帝陛下文明

憲古睿哲先天厯象教民本堯舜之智水旱罪已蓋禹
湯之仁固將推廣其誠心豈特奉行於故事爰因歲首
已宣布於王言孰謂民愚咸識知於帝力臣無任

又

臣軾言伏蒙聖恩特賜臣詔書并元祐五年厯日一卷
者竊惟稽古之君必以授時為急底日不失日官既有
常先時不及時罰在無赦申以丁寧之詔致其惻怛之

誠習見頒行止謂有司之故事考其情實則本聖人之
用心臣軾中謝恭惟太皇太后陛下元功在天盛德冠
古順帝之則雖並用於恩威與物為春蓋同歸於仁厚
而臣入奉講學出牧農民恭布詔書悉傳閭里庶德音
之昭格致嗣歲之豐穰臣無任

賀興龍節表

臣軾言天佑民而作君惟德是輔帝生商而立子有開
必先納富壽於方來實兆基於茲日臣軾中賀恭惟皇帝

陛下文思天縱聖敬日躋以若稽古之心上遵王路行不忍人之政下酌民言神聽靖共天壽平格臣久塵法從出領郡符奉萬年之觴雖阻陪於下列接千歲之統猶及見於昇平草木之情日月所照臣無任

賀坤成節表

臣軾言仁惟天助壽不假於禱祈澤在民心言自成於雅頌恭臨誕月仰祝聖期雖凡庶之何知亦臣子之常分中賀恭惟太皇太后陛下儲神天地託國祖宗元勲

本自於無心神智實生於至靜同守大器於茲六年放
億萬之羽毛未若消兵以全赤子飯無數之緇褐豈如
散廩以活饑民臣躬領郡符目覩茲事載瞻象闕阻奉
瑤觴嘉與海隅之人同罄華封之祝臣無任

辭免翰林學士承旨第一狀

右臣今月二十八日奉勅已除臣翰林學士承旨左朝
奉郎知制誥詔書到日可依條交割公事訖乘遞馬疾
速發來赴闕臣已於當日依條交割公事訖伏念臣頃

以兩目昏暗左臂不仁堅辭禁林得請便郡庶緣靜退
少養衰殘二年於茲一事無補才有限而難強病不減
而益增但以東南連被災傷不敢陳乞別求安便敢謂
仁聖尚賜矜憐召還故官復加新寵不惟朝廷公議未
允實亦衰病勉強不前兼竊覩邸報臣弟輟已除尚書
右丞兄居禁林弟為執政在公朝既合迴避於私門實
懼滿盈計此誤恩必難安處伏望聖慈除臣一郡以息
多言臣見起發前去至宿泗間聽候指揮謹錄奏聞伏

候勅旨

第二狀

右臣近蒙恩除翰林學士承旨臣以衰病不才難居禁
近兼以弟轍忝與執政理合迴避奏乞除臣一郡今奉
詔書未賜開允恩威之重需若雷雨豈臣孱陋所敢固
違伏念臣自去闕庭日加衰白故疾不愈舊學已荒更
冒寵榮必速顛躓而况清要之地衆所奔趨兄弟迭居
勢難安處正使緣力辭而獲譴猶賢於忝冒而致災伏

望聖慈察臣誠懇特賜除臣知揚越陳蔡一郡臣今已
到揚州迺遷前去南京以來聽候指揮干冒天威臣無
任戰恐待罪之至謹錄奏聞伏候勅旨

第三狀

右臣近蒙恩除翰林學士承旨臣以衰病不才難居禁
近兼以弟輟備位執政理合迴避尋兩次奏乞除臣一
郡准尚書省劄子三省同奉聖旨依前降詔書不允者
臣之愚慮終以弟輟親嫌於義未安竊見仁宗朝王洙

為學士以其從子堯臣叅知政事故罷臣今來欲乞依
王洙故事迴避仍乞檢會前奏除臣揚越陳蔡一郡屢
犯天威臣無任戰恐待罪之至謹錄奏聞伏候勅旨

乞候坤成節上壽訖復遂前請狀

右臣近奏乞依王洙故事罷翰林學士承旨仍乞一郡
奉聖旨依累降指揮不允者銜戴恩慈怵迫威命已經
三却其敢固違已於今月二十九日赴閣門祇受告命
訖然臣衰病日加心力難強親嫌之避愚守不移伏見

坤成節在近欲候上壽訖復遂前請勉強供職庶表見
臣子恭順之心逡巡力辭蓋終存典刑分義之守謹錄
奏聞謹奏

謝宣召再入學士院狀二首

右臣今月十一日翰林待詔梁廸至臣所居奉宣聖旨
召臣入院充學士承旨使星下燭生蓬華之光華天澤
旁流失桑榆之枯槁國有用儒之盛士知稽古之榮伏
以翰墨之林號稱內相文章之外不取他才至於用人

可以觀政文武並用或成頗牧之功邪正雜居至有佞
文之患惟貴且近故難其人而況金鑾玉堂親被絲綸
之密北廳東閣獨稱年德之高必有異人以齊衆口而
臣本緣衰病出守江湖以一方凋弊之餘當二年水潦
之厄戴星而治僅免流離及瓜而還恍如夢寐交親迎
勞都邑聚觀驚華髮之半空笑丹心之未折宜投閑散
以養衰殘豈期過採於虛名復使榮加於舊物此蓋伏
遇皇帝陛下德如乾健明配日中既祖述於堯仁復躬

行於舜孝才難之歎人誦斯言緣先帝之德音收孤臣
於散地言雖直而無罪身愈遠而益親委曲保全始終
錄用臣敢不更磨朽鈍少補涓埃難得者時未有捐軀
之會勿欺而犯誓無患失之心臣無任感天荷聖激切
屏營之至謹錄奏謝以聞謹奏

又

右臣今月十一日翰林待詔梁迪至臣所居奉宣聖旨
召臣入院充學士承旨者衰遲無用寵既溢於當年眷

待有加恩復隆於晚節使華臨賁天語丁寧聳里巷之
驚觀歎朝廷之用舊伏以禁林分直法本六人帝語親
承舊惟一老不緣名次之先後斷自上心之簡求冠內
朝供奉之班極儒者遭逢之盛凡膺此選宜得異材而
臣本以愚忠累塵器使初無已試之效但有過實之名
千里闕庭二年江海憂深投杼豈無三至之言詔復賜
環不待一人之譽此蓋伏遇太皇太后陛下道無私載
公生至明以七年之照臨觀羣臣之邪正知臣剛褊自

用雖有寬饒之狂察臣招麾不移庶幾長孺之守故還
舊物益茂新恩臣敢不早夜以思死生不易雖桑榆之
景已迫殘年而犬馬之心猶思後效

謝賜對衣金帶馬狀二首

右臣伏蒙聖慈以臣入院特賜衣一對金腰帶一條并
魚袋鍍金銀鞍轡馬一匹者漢官三服已分密麗之珍
唐監八坊復下權奇之駿拜嘉甚寵省已何功伏念臣
受材迂踈賦命寒蹇幼師季路止服緼袍長慕少游欲

乘下澤目眩重金之耀神驚四牡之良俛仰自惟周章
失次此蓋伏遇皇帝陛下憂勤黎庶寤寐儆賢故損廐
庫之儲以廣英雄之穀致茲孱陋亦被寵光臣敢不求
稱於衷益鞭其後薄德盛服當戒維鵜之篇強力安邦
庶幾有駟之頌臣無任感天荷聖激切屏營之至謹錄
奏謝以聞謹奏

又

右臣伏蒙聖慈以臣入院特賜衣一對金腰帶一條并

魚袋金鍍銀鞍轡馬一匹者鏤錫金輓示有馳驅之勞
寶帶襲衣豈無約束之義上既循名而責實下當因物
以貢誠伏念臣少則賤貧長而困阨仲卿龍具追晏子
之一裘伯厚雞栖陋景公之千駟無功拜賜服寵汗顏
顧惟何人膺此異數此蓋伏遇太皇太后陛下躬行慈
儉德貫天人約於奉己而侈於養賢嚴於私親而寬於
馭衆憐其朽鈍借以光華臣敢不衣被訓詞服勤鞭箠
惟德其物永觀不易之言思馬斯徂更厲無邪之志

笏記二首

臣蒙恩授翰林學士承旨知制誥兼侍讀者出膺閭寄
入長禁林皆儒者之極榮豈駑材之所稱此蓋伏遇皇
帝陛下法天凝命稽古象賢總攬羣英兼收小器欲效
涓塵之報未知糜隕之期臣無任感天荷聖激切屏營
之至

又

臣蒙恩授翰林學士承旨知制誥兼侍讀者出守無功

方期竄逐召還何幸復玷清華此蓋伏遇太皇太后坤
載沉潛母慈均一既陶甄於碩曠復封植於叢材誓卒
餘生少圖來效臣無任感天荷聖激切屏營之至

謝兼侍讀表二首

臣軾言今月四日伏奉告命除臣兼侍讀者用非其分
寵至若驚滿溢之憂遂巡莫避臣某誠惶誠恐頓首頓
首伏念臣與弟轍同登進士並擢賢科內外分掌於制
書先後迭居於翰苑今臣以經史入侍司言行于中轍

以丞轄立朝督綱條於外恭承明詔不許固辭以為兄弟之同升自是朝廷之盛事承明三入僅比古人大雅一門無慙舊史人非木石恩重丘山恭惟太皇太后陛下明極照臨憂深付託欲為社稷之衛莫如臣僕之賢以帝堯之哲而甚畏於壬人以孔子之聖而思見於狷者致茲選擇驟及迂愚臣敢不淬勵初心激昂晚歲誓堅必死之節少報不貲之恩臣無任感天荷聖激切屏營之至謹奉表稱謝以聞臣某誠惶誠恐頓首謹言

又

臣軾言今月四日伏奉告命除臣兼侍讀者叨承新命
祇服訓詞薄技已窮舊恩未替臣某誠惶誠恐頓首頓
首伏念臣志大而才短論迂而性剛以自用不回之心
處衆人必爭之地不早退縮安能保全是以三年翰墨
之林屢遭飛語再歲江湖之上粗免煩言豈此身愚智
之殊蓋所居閑劇之致臣之自處何者為宜而況講讀
之司帷幄最近分章摘句則何以報非常之知因事獻

言又必貽前日之患雖仰恃天日之照實常負冰淵之虞恭惟皇帝陛下大德庇民小心順帝雖天覆地載以聖不可知為神而日就月將以學而不厭為智曲收舊物以廣多聞臣敢不職司其憂本無分於中外欲報之德誓不易於死生臣無任感天荷聖激切屏營之至謹表稱謝以聞臣某誠惶誠恐頓首頓首謹言

謝三伏早休表二首

大火既中三庚云伏炎熹之病貴賤所同忽蒙退食之

恩遂失流金之酷恭惟皇帝陛下仁均動植明燭幽微
上有無逸之勤下無獨賢之歎臣等逢時多暇竊祿安
居共揚扇暍之風以安黎庶更勵飲冰之節少答生成
臣等無任仰天荷聖激切屏營之至

又

星火見而金微日方可畏朝氣銳而晝情恩獲少休上
既知勞下皆忘暑恭惟太皇太后陛下勞謙恭已內恕
及人雖天地無一物之私而父母有至誠之愛臣等仰

蒙寬假動獲便安未明無顛倒之衣省循何幸夙退有
委蛇之食歌詠而歸臣等無任仰天荷聖激切屏營之
至

謝除龍圖閣學士知潁州表二首

臣軾言伏蒙聖恩以臣累章乞郡除臣龍圖閣學士知
潁州者引嫌求避顧舊典之甚明易職寵行荷新恩之
至厚踈愚自省慙悚交并中謝伏念臣學陋無聞性迂
難合受四朝之知遇竊五郡之蕃宣吳會二年但坐糜

於廩祿禁林數月曾未補於絲毫敢冀殊私復還舊物
恭惟太皇太后陛下仁涵動植明燭幽微知臣獨受於
聖知欲使曲全於晚節憐其無用許以少安凡力請八
章而後從使不為一乞而遽去在臣進退可謂光榮雖
老病懷歸已功名之無望而衷誠思報尚生死之不移
臣無任感天荷聖激切屏營之至謹奉表稱謝以聞

又

臣軾言伏蒙聖恩以臣累章乞郡除臣龍圖閣學士知

潁州者備員經席幸依日月之光引避親嫌實有簡書

之畏恩還舊職寵寄近蕃衰朽增華省循知愧

中謝伏

念臣生無他技天與愚忠雖所向之奇窮獨受知於仁
聖力求便郡蓋常懷老退之心伏讀訓詞有不為朕留
之語殊私難報危涕自零恭惟皇帝陛下緝熙光明剛
健篤實方收文王之四友以集孔聖之大成而臣苟念
餘生之安莫伸一割之用桑榆暮齒恐遂齎志而莫償
犬馬微心猶恐蓋棺而後定臣無任

謝賜對衣金帶馬狀二首

右臣伏蒙聖慈特賜臣對衣一襲金腰帶一條銀鞍轡
馬一匹者錫之上駟敢忘致遠之勞佩以良金無復忘
腰之適執鞭請事顧影知慙恭惟皇帝陛下禹儉中修
堯文外煥長轡以御卒皆四牡之良所寶惟賢豈徒三
品之貴出捐車服收輯事功而臣衰不待年寵常過分
枯羸之質匪伊垂之而帶有餘斂退之心非敢後也而
馬不進徒堅晚節難報深恩臣無任

又

右臣伏蒙聖慈特賜臣對衣一襲金腰帶一條銀鞍轡馬一匹者出笥之珍以旌有德在垆之駟豈及無功而臣首尾四年叨塵三錫省躬內灼服寵汗流恭惟太皇太后陛下慈儉自居龍光四達德被海宇豈惟一襲之衣恩結華夷何止十圍之帶羣賢在馭六轡自調而臣頃以衰羸止求安便奉宣德意庶幾五袴之謠收斂壯心無復千里之志更期力報有愧空言臣無任

潁州謝到任表二首

臣軾言伏蒙聖恩除臣龍圖閣學士知潁州臣已於今
月二十二日到任訖者避嫌引疾慙無國士之風揣分
知難粗守人臣之節曲蒙溫詔遂假名邦已見吏民惟
知感忤臣某中謝伏念臣早緣多難無意軒裳晚以虛
名偶塵侍從雖云時可每與願違既未決於歸田故力
求於治郡慈母愛子但憐其無能明君知臣終護其所
短自欣投老漸獲安身此蓋伏遇太皇太后陛下慈儉

臨民剛柔布政叅天地而有信喜怒不陳體水鏡之無
心忠邪自辨致茲愚直亦克保全雖任職居官無過人
者而見危授命盖有志焉臣無任

又

臣軾言伏蒙聖恩除臣龍圖閣學士知潁州臣已於今
月二十二日到任記者支郡責輕未即滿盈於小器豐
年事簡非徒飽煖於一家覽几席之溪湖雜簿書於魚
鳥平生所樂臨老獲從臣某誠惶誠恐頓首頓首伏以

汝穎為州邦畿稱首土風備於南北人物推於古今賓
主俱賢蓋宗資范孟博之舊治文獻相續有晏殊歐陽
修之遺風顧臣何人亦與茲選此蓋伏遇皇帝陛下丕
承六聖總攬羣英生知仁孝之全學識文武之大謂臣
簪履之舊物嘗忝帷幄之近臣奉事七年崎嶇一節意
其忠義許國故暫召還察其老病畏人復許補外置之
安地養此散材更少勉於桑榆誓不忘於畎畝臣無任

上清儲祥宮成賀德音表二首

臣軾言伏觀九月二十七日德音以上清儲祥宮成減
決四京及諸道見禁罪人者靈光下燭慶新宮之落成
霈澤旁流洗庶獄之多罪散為和氣坐致豐年臣某誠
歡誠忭頓首頓首臣聞舜禹之心以奉先為孝本釋老
之道以損己為福田永惟坤作之成每辭天下之養卑
宮何陋大練為安故能捐萬金之資以成二聖之意為
國迎祥而國無所費與民祈福而民不知勞鑾輅親臨
神靈昭格觀士女之和會既同其休念囹圄之幽囚或非

其罪用孚大號以達惠心恭惟太皇太后陛下恭儉以
仁明哲作則愛惜帑廩不供浮費之私重慎典刑每存
數赦之戒一寬湯網衆識堯心臣以從官出臨近甸率
吏民而拜慶助父老之歡謠永望闕庭實同咫尺臣無
任

又

臣軾言伏覩九月二十七日德音以上清儲祥宮成減
決四京及諸道見禁罪人者琳館告成神人交慶綸音

下需過故盡除臣某誠歡誠忭頓首頓首臣聞漢武築
通天之臺魏明作凌雲之觀皆厲民而私已或秘祝以
斬年然猶形於詠歌被之金石而況文孫繼志神母考
祥追六聖之心本枝百世均萬方之慶圉圉一空豈惟
洗濯於丹書固已光華於青史恭惟皇帝陛下知人堯
哲克已禹勤積德之宮以文章為藻飾庇民之屢以仁
義為基扃眷撲斲之成能亦聖神之餘事臣久叅法從
風侍經幃樂石銘詩雖幸執太史之筆大圭薦裸不獲

踐屬車之塵徒與吏民共茲慶澤臣無任

賀興龍節表

臣軾言天佑我邦祥開是日山川貢瑞日月增華臣某
誠歡誠忭頓首頓首伏以上聖所儲有慈儉不爭之寶
輿情共獻蓋憂勤無逸之龜不待禱祠而來自然天人
之應恭惟皇帝陛下堯仁舜孝禹勤湯寬德莫大於好
生故以不殺為神武道莫尊於問學故以所聞為高明
錫厥庶民嚮用五福臣備員內閣出守近畿雖違咫尺

天威乃身在外而上千萬歲壽此意則同臣無任

賀駕幸太學表二首

臣軾言恭聞十月十五日駕幸太學者輦回原廟既崇
廣孝之風幄次儒宮復示右文之化禮行一日風動四
方臣某誠歡誠忭頓首頓首臣聞五學之臨三代所共
蓋天子不敢自聖而盛德必有達尊在漢永平始舉是
禮雖臨雍拜老有先王之規而正坐自講非人主之事
豈如允哲退託不能奠爵伏興意默通於先聖橫經問

難言各盡於諸儒恭惟皇帝陛下文武憲邦聰明齊聖
大度同符於藝祖至仁追配於昭陵故舉舊章以興盛
節臣早塵法從久侍經幃永矣馳誠想聞合語於東序
斐然作頌行觀獻馘於西戎臣無任

又

臣軾言恭聞十月十五日皇帝駕幸太學者濟濟多士
靈承上帝之休雍雍在宮服膺文母之教風傳海宇慶
溢臣工臣某誠歡誠忭頓首頓首臣聞學校太平之文

而以得士為實經術致治之具而以愛民為心心既立
而具乃行實先克而文斯應永惟坤載之厚輔成天縱
之能惟使文子文孫莫不仁故於先聖先師無所愧恭
惟太皇太后陛下憂深祖構德燕孫謀黃裳之文斧藻
萬物青衿之政長育羣材豈惟鼓舞於士夫實亦光
華於史冊臣冒榮滋久被遇最深外告成功行喜鵲音
之章中修潛德孰知麟趾之風臣無任

謝賜歷日表二首

迎日推策雖曰百王之常後天奉時惟我二后之德伏
讀詔旨灼知聖心中謝伏以嗣歲將興舊章畢舉三朝
受海內之圖籍七月陳王業之艱難冬有祁寒知民言
之可畏陽居大夏識天道之至仁故於頒朔之初更下
布新之詔恭惟太皇太后陛下視民如子以國為家振
廩勸分人自忘於艱歲消兵去殺天必報之豐年臣敢
不省事清心貴農時之不奪思患預備期歲計之有餘
庶竭微誠少裨洪造臣無任

又

歲頒正朔蓋春秋統始之經郡賜璽書亦漢家寬大之
詔實為令典豈是空文臣軾誠惶誠懼頓首頓首伏以
望歲者生民之至情畏天者人君之大戒所以常言報
應而不言時數每奏水旱而不奏嘉祥上有消復之心
下有變調之道固資共理同底純熙恭惟皇帝陛下祇
敬三靈憂勤萬宇為仁一日自然天下之歸教民七年
豈無善人之效臣敢不仰遵堯典寅奉夏時謹隄防溝

洫之修行勞來安定之政庶殫綿力少助至仁臣無任

東坡全集卷六十八

東坡全集卷六十九

宋蘇軾撰

表狀四十二首

揚州謝到任表二首

臣軾言伏蒙聖恩除臣知揚州臣已於今月二十六日
到任訖者支郡養病裁能免咎通都移牧自愧何功屢
玷恩榮實深慙汗臣某中謝伏念臣早緣竊祿稍習治
民在先帝日已歷三朝近八年間復忝四郡平生所願

滿足無餘志大才疎信天命而自遂人微地重恃聖眷
以少安恭惟太皇太后陛下子惠萬民器使多士以謂
朝廷之德澤付於郡縣與監司乃眷江淮之間久罹水
旱之苦隣封二浙饑疫相薰積欠十年豐凶皆病臣敢
不上推仁聖之意下盡疲驚之心庶復流亡少寬憂軫
臣無任

又

一麾出守方愧媿安十國為連復膺寵寄恩榮既溢慙

汗靡寧臣某

中謝

伏念臣本以鰥生冒居禁從頃緣多

病力求賴尾之行曾未半年復有廣陵之請蓋以魚鳥
之質老於江湖之間習與性成樂居其舊天從民欲許
擇所安恭惟皇帝陛下欽明文思剛健純粹天功默運
灼知萬化之情人材並收各取一長之用如臣衰朽尚
未遐遺命至蹇而祿已盈每懷憂懼志雖大而才不副
莫報恩私臣無任

謝賜卹刑詔書表二首

臣軾言伏蒙聖恩賜臣欽卹刑獄詔書一道者時令舉行雖云故事天心惻怛本出至誠德既洽於好生民雖死而無憾臣某誠惶誠懼頓首頓首伏以刻木畫地志士不居鑠石流金平人猶病宜軫聖神之念實為哀敬之先訓詰丁寧吏民感動恭惟皇帝陛下禹湯罪已堯舜性仁以不忍人之心行若稽古之政豈止緩獄實期無刑臣敢不推廣上恩厚風俗於無犯申嚴法意消盜賊於未萌少假歲時庶空囹圄臣無任

又

暑雨其咨既軫小民之病麥秋已至復虞輕繫之淹祇
服訓詞灼知天意臣某中謝伏以仁聖之德哀矜為先
常內恕以及人故深居而念遠齋戒處掩則知暴露之
勤紛紜裨延不忘縲紲之苦吏既罔懈民知無冤恭惟
太皇太后陛下事法祖宗德參天地凱風養物散為扇
暘之涼靈雨應時同沾執熱之濯臣敢不盡其哀敬濟
以寬明奉漢律之嚴母令瘼死推慈母之意務在平反

庶竭愚忠少行德意臣無任

賀立皇后表二首

臣軾言伏覩制書今月十六日皇后受冊禮成者續女
維莘倪天之妹事關廟社喜溢人神中賀臣聞三代之
興皆有內助二南之化實本人倫維闕睢正始之風具
既醉太平之福民有所恃邦其永昌恭惟皇帝陛下自
誠而明惟睿作聖輯寧夷夏德既茂於治朝輔順陰陽
政兼修於內職既膺大慶益廣至仁下逮海隅夫婦無

有愁歎上符天造日月為之光明受祿無疆與民同樂
臣無任

又

吉日既涓柔儀允正穀珪往聘象服來朝

中賀

臣聞周

姜任姒之賢位非皆極漢陰馬鄧之貴德或有慙盛哉
六禮之陳襲此三宮之慶恭惟太皇太后陛下任付託
之重躬保佑之勞公天下不私其親配宸極必先以德
徽音不墜嗣成慈孝之風仁壽無疆坐享雲來之養臣

限以官守不獲躬詣闕庭臣無任

賀坤成節表

臣軾言歲復六壬襲嘉祥於太史火流七月紀令節於詩
人盡海宇之含生舉欣榮於茲日臣某

中賀

臣聞君以民

為心體天用民為聰明未有心胖而體不紓民悅而天不
應故好生惡殺是為仁壽之基捐利與民斯獲豐年之慶
恭惟太皇太后陛下恭儉一德勤勞百為推天覆地載之
心阜成民物盡父教母憐之道誨養臣鄰共知難報之恩

必享無疆之福臣以出守淮海無由躬詣闕庭臣無任
謝除兵部尚書賜對衣金帶馬狀二首

蒙恩賜臣衣一對金帶一條并魚袋金鍍銀鞍轡馬一
匹者盛服在躬無復曳婁之歎名駒出廐遂忘奔走之
勞施重丘山身輕毫末伏念臣少賤而鄙性推少文衣
敝緼袍未嘗有恥乘款段馬自以為安豈意晚年屢膺
此寵此蓋伏遇皇帝陛下紹隆景命總攬羣英無競維
人勢已加於九鼎惟德其物恩有重於千金臣敢不上

體眷懷勉思報稱贈繞朝之策愧不能謀振屈原之衣期於自潔臣無任

又

伏以在筭之珎本出於民力脫驂之賜以結於士心顧臣何人屢膺此寵伏念臣學本為已材不適時乘伯厚之車雖云疾惡東公西之帶愧不能言而二年之間三拜是賜此蓋伏遇太皇太后陛下心存社稷德協天人以長策駕馭四方以盛德藩飾多士故令衰朽猶玷光

華豈曰無衣蓋獨求於安吉慨然攬轡敢有志於澄清
臣無任

謝魚侍讀表二首

伏奉制書除臣守兵部尚書魚侍讀者重地隆名不擇
所付清資厚祿以養不才

中謝

伏念臣以草木之微當

天地之澤七典名郡再入翰林兩除尚書三忝侍讀雖
當世之豪傑猶未易居矧如臣之孤危其何能副恭惟
皇帝陛下聖神格物文武憲邦重離繼明何煩燭火之

助大屢既構尚求一木之支而臣白首復來丹心已折
望西清之帷幄久立徬徨聞長樂之鼓鐘恍如夢寐莫
報丘山之施猶貪頃刻之榮臣無任

又

流汗恩榮再辭莫獲強顏衰朽一節以趨臣軾

中謝

恭惟

先帝復六卿之名本欲後人識三代之舊古今殊制間
劇異宜武選隸於天官兵政總於樞輔故司馬之職獨
省文書而師氏之官職在論說命臣兼領聖意可知恭

惟太皇太后陛下約已裕民忘家憂國知先王之兵必
本於道德故以儒臣為七兵知人主之學必通於民情
故目郡守為五學而臣迂疎不可強合早緣衰病難以
久居終當自効於所長之間或可報恩於未死之日臣
無任

進郊祀慶成詩表

伏覩今月十四日郊祀禮成者親奠璧琮始見天地兼
陳祖宗六廟之典參用漢唐三代之文夷夏來同人神

允答臣某中賀恭惟皇帝陛下聿追來孝對越在天外
修神考之文章內服文母之慈儉四方觀禮百辟宅心
雪止風恬驗神祇之來饗雲黃歲美知豐凶之在天臣
以藝文入侍帷幄考事而知天意陳詩以達民言雖無
足觀亦各其志臣無任瞻天望聖慚懼屏營之至所撰
郊祀慶成詩一首謹繕寫陳表上進以聞

謝除兩職守禮部尚書表

伏蒙聖恩除臣端明殿學士兼翰林侍讀學士守禮部

尚書者衰年自引久抱此心異數併加實為非意辭不

獲命愧何以堪臣軾

中謝

竊惟以殿命官本緣麟趾之

舊因時修廢近正金華之名歷代所榮於今為甚自元
豐之末官制以來若非身兼數器之人未有名冠兩職
之重而况秩宗之任邦禮是司豈臣迂愚所當兼領此
盖伏遇太皇太后陛下憂深社稷慮極安危求忠臣於
愚直之中論治道於文字之外知臣難進而易退或非
患失之鄙夫故授以禮樂清閒之司使專於論說琢磨

之事此恩難報願輸歲月之勤度已所宜終遂江湖之請臣無任

又

備員西學已愧空疎易職東班尤驚忝冒遂領宗卿之事併為儒者之榮臣軾中謝始臣之學也以適用為本而恥空言故其仕也以及民為心而慙尸祿乃者屢請治郡兼乞守邊欲及殘年少施實効而有志莫遂負愧何言今乃以文字為官常語言為職業下無所見其能

否上無所考其幽明循省初心有覲面目故於拜恩之日少陳有益之言孔子曰一言可以興邦而孟子亦曰一正君而天下定昔漢文帝悅張釋之長者之言則以德化民輔成刑措之功而孝景帝入晁錯數術之語則以智馭物馴致七國之禍乃知為國安危之本祇在聽言得失之間恭惟皇帝陛下即位以來學如不及問道八年寒暑不廢講讀之官談王而不談霸言義而不言利八年之間指陳文理何啻千萬雖所論不同然其要

不出六事一曰慈二曰儉三曰勤四曰慎五曰誠六曰明慈者謂好生惡殺不喜兵刑儉者謂約已費省不傷民財勤者謂躬親庶政不遜聲色慎者謂畏天法祖不輕人言誠者謂推心待下不用智數明者謂專信君子不雜小人此六者皆先王之陳迹老生之常談言無新奇人所忽易譬之飲膳則為穀米羊豕雖非異味而有益於人譬之藥石則為著朮參苓雖無近效而有益於命若陛下信受此言如御飲膳如服藥石則天人自應福

祿難量而臣等所學先王之道亦不為無補於世若陛下聽而不受受而不信信而不行如聞春禽之聲秋蟲之鳴過耳而已則臣等雖三尺之喙日誦五車之書反不如醫卜執技之流簿書奔走之吏其為尸素死有餘誅伏望陛下下一覽臣言少留聖意天下幸甚

謝賜對衣金帶馬狀二首

蒙恩賜衣一對金帶一條并魚袋金鍍銀鞍轡馬一匹服官奠篚響動佩章圉士效牽先生韜策伏以三賜之

重莫隆於車馬五采之賁兼施於衣裳汝必有功服之
無斃而臣衰年弱幹固難強於馳驅枯木朽株本不願
於文繡寵加意外愧溢顏間此蓋伏遇皇帝陛下因能
任官稱物平施標名器以勵士上有誠心正銜勒以馭
人下無遺力臣敢不思稱其服益勵厥躬雖愧立朝之
能言之近用猶希辨道輸老智於暮年臣無任

又

蒙恩賜衣一對金帶一條并魚袋金鍍銀鞍轡馬一匹

服章在笥賁及衰殘銜勒過庭喜先徒御伏以物生有
待天施無窮草木何知冒慶雲之渥采魚鰕至陋借滄
海之榮光雖若可觀終非其有妻孥相顧驚屢致於匪
頒道路竊窺或反增於指目此蓋伏遇太皇太后陛下
聰明齊聖陳錫載周含垢匿瑕而察於求賢卑宮菲食
而侈於養士士豈輕於千里念非其人言有重於兼金
當思所報臣無任

笏記二首

榮兼兩職寵與六卿豈伊衰朽之餘有此遭逢之異此
蓋伏遇太皇太后陛下坤元利正天造無私靡求備於
一人將曲成於萬物文章小技縱有效於涓埃草木微
生終難酬於雨露臣無任

又

陞榮祕殿列職西清併此光華付之衰朽此蓋伏遇皇
帝陛下剛健純粹緝熙光明曲搜已棄之材將建無窮
之業顧慙淺陋將何補於盛明惟有朴忠誓不回於生

死臣無任

定州謝到任表

兵民重寄本禦侮以折衝疆場久安但坐嘯而畫諾才
微祿厚恩重命輕臣軾中謝伏念臣一去闕庭三換符

竹坐席未煖召節已行筋力疲於往來日月逝於道路
未經周歲復典兩曹朝廷非不用臣愚憊自不安位所
宜竄逐更冒寵榮此蓋伏遇皇帝陛下離明正中乾健
獨運追述東朝之遺意收此散材眷言西學之舊臣付

之善地致此衰朽尚未棄捐臣敢不勤卹民勞密修邊備
苟無大過以及暮年漸還魚鳥之鄉以畢桑榆之景臣
無任

慰正旦表

嗣歲將興雖有作新之慶舊穀既沒共深追遠之思凡
在照臨舉增懷慕臣軾

中謝

恭惟皇帝陛下道躋堯禹

行比騫參方受圖於二朝明發不寐念御簾於雙日孝
思柰何幸寬罔極之哀少副有生之望臣限以官守不

獲躬詣闕庭臣無任

謝賜厯日表

夙頒溫詔寵拜新書吏得承宣民知早晚臣軾

中謝臣

聞言天道者有數故閏以正時訓農事者在人則王無
罪歲豈獨典常之舊必存忠利之心恭惟皇帝陛下輔
相財成聰明時憲居德刑於冬夏意與天同暨聲教於
朔南責在臣等敢不時使薄斂思患預防勤卹鰥孤幸
流亡之盡復兼明威惠庶戎夏以皆安臣無任

慰宣仁聖烈皇后山陵禮畢表

恭聞今月七日大行宣仁聖烈太皇太后山陵禮畢者
日月有時義當即遠雨露既降思則無窮遙知穆穆之
光尚起皇皇之望臣軾中謝恭惟皇帝陛下道循祖德
德契天心大哉孔子之仁泣然流涕至矣顯宗之孝夢
若平生願寬舜慕之心少副堯封之祝臣限以官守不
獲躬詣闕庭無任瞻天望聖激切屏營之至

慰宣仁聖烈皇后祔廟禮畢表

恭聞今月十七日宣仁聖烈皇后升祔禮畢者反寢而
虞既盡飾終之典宅神於廟益隆追遠之思凡在照臨
舉增悲慕臣軾中謝竊以六朝繼聖並傳家法之餘三
后御簾高出古人之右逮此登配廓然永懷恭惟皇帝
陛下奉順母慈表章坤德四謚哀榮之詔簡策有光數
詩挽餞之音道塗垂涕日月云遠典禮告成願寬無益
之悲少副有生之望臣限以官守不獲躬詣闕庭無任
瞻天望聖激切屏營之至

謝賜衣襖表

十一月九日翰林醫官王宗古至伏蒙聖慈傳宣存問
賜臣等勅及初冬衣襖者齊官三服已寬卒歲之憂漢
札十行更佩先春之煖恩均吏士聲動華夷臣軾

中謝

伏以禮著始裘詩歌無褐邊陲更戍本為臣子之常朔
易早寒特軫聖神之念惟德其物豈曰無衣恭惟皇帝
陛下廣運聰明力行恭儉威風旁振方戰栗於天驕溫
詔下融遂流漸於河凍既無功而坐食實有愧於解衣

敢不推廣朝廷之仁益收凍餒申嚴祖宗之法少肅惰
偷庶收汗馬之勞以解濡鵠之誚臣無任

到惠州謝表

先奉告命落兩職追一官以承義郎知英州軍州事續
奉告命責授臣寧遠軍節度副使惠州安置已於今月
二日到惠州公叅訖者仁聖曲全本欲畀之民社羣言
交擊必將致之死亡尚荷寬恩止投荒服臣軾中謝伏
念臣性資褊淺學術荒唐但信不移之愚遂成難赦之

咎迹其狂妄久合誅夷方尚口乃窮之時蓋擢髮莫數
其罪豈謂天幸得存此生此蓋伏遇皇帝陛下以大有
為之資行不忍人之政湯網開其三面舜干舞於兩階
念臣奉事有年少加憐愍知臣老死無日不足誅鋤明
降德音許全餘息故使逐虜之馬猶獲蓋帷轂棘之牛
得違刀几臣敢不服膺嚴訓託命至仁洗心自新沒齒
無怨但以瘴癘之地魑魅為隣衰疾交攻無復首丘之
望精誠未泯空餘結草之忠臣無任

到昌化軍謝表

今年四月十七日奉被告命責授臣瓊州別駕昌化軍
安置臣尋於當月十九日起離惠州至七月二日已至
昌化軍訖者並鬼門而東驚浮瘴海以南遷生無還期死
有餘責臣軾中謝伏念臣頃緣際會偶竊寵榮曾無毫
髮之能而有丘山之罪宜三黜而未已跨萬里以獨來
恩重命輕咎深責淺此蓋伏遇皇帝陛下堯文炳煥湯
德寬仁赫日月之照臨廓天地之覆育譬之蠕動稍賜

矜憐俾就窮途以安餘命而臣孤老無託瘡痍交攻子
孫慟哭於江邊已為死別魑魅逢迎於海上寧許生還
念報德之何時悼此心之永已俯伏流涕不知所云臣
無任

提舉玉局觀謝表

臣先自昌化軍貶所奉勅移廉州安置又自廉州奉勅
授臣舒州團練副使永州居住今行至英州又奉勅授
臣朝奉郎提舉成都府玉局觀在外州軍任便居住者

七年遠謫不意自全萬里生還適有天幸驟從縲紲復

齒縉紳臣軾

中謝

伏念臣才不逮人性多忤物剛褊自

用可謂小忠猖狂妄行乃蹈大難皆臣自取不敢怨尤
會真人之勃興與萬物而更始而臣獨在幽遠寂為冥
頑迨茲起廢之初倍費生成之力終蒙記錄不遂棄捐
此蓋伏遇皇帝陛下正位龍飛對時虎變神武不殺豈
非受命之符清淨無為坐獲消兵之福聰明不作邪正自
分使臣得同草木之微共霑雷雨之解臣敢不益堅素

守深念往愆沒齒何求不厭飯蔬之陋蓋棺未已猶懷
結草之忠臣無任

慰皇太后上仙表

伏覩正月十四日大行皇太后遺詔者慟發六宮悲纏
九土奉諱哀殞不知所云臣軾

中謝

大行皇太后德冠

三朝化行四海獨決大策措天下於太山之安退避東
朝復明辟為萬世之法奄終壽祿莫曉天心恭惟皇帝
陛下仁孝自天哀傷過禮惟聖達節豈復行曾閔之難

以民為心則當法舜禹之大願少寬於追慕庶下荅於
臣民臣以外郡居住不獲奔赴闕庭無任哀痛隕越之
至

代普寧王賀冬表

七日來復陽既進而歲功成八風不姦樂已調而君道
得惟聖在御與天同符恭惟皇帝陛下嗣守洪基丕承
先志法小疵以求助期既醉之太平淵默臨朝順陽道
之消長清淨為治俾物類以昭蘇受福無疆成功不宰

臣猥以暗弱仰荷誨憐敢先百辟之朝以祝萬年之壽

謝御膳表

臣伏蒙聖恩特賜寬假將理今月七日又再蒙中使臨
賜御膳問其治療之增損督以朝參之日辰臣下履淵
冰上負芒刺蹄涔雖小能延兩耀之光寸草何知莫報
三春之澤正使豚魚幽陋木石堅頑亦將激勵忘軀奔
走赴職而臣尚有無厭之請敢守不移之愚在法當誅
原情可憫實以負薪之疾積有歲時勿藥之祥恐非旦

夕終願江淮之一郡以安犬馬之餘生尚冀此身未填
溝壑期於異日別効涓埃

代滕達道景靈宮奉安表

衣冠出游魏乎宮闕之盛祖考來格燦然日月之明新
禮光前彌文範後繼以作解之雷雨仍收繪像之子孫
聳觀華夷淪浹枯朽竊以祀無豐疎祭不欲昵自仁率
親故同宮而合享惟聖作則實考古而便今庶民子來五
福交應蔚山河之增氣紛嶽瀆以來朝仙木蟠根五聖

既聯於龍衮靈芝擢秀九莖復出於齋房皇帝陛下舜
孝格天堯文冠古損益漢唐之典故潤色祖宗之規摹
壽考萬年永作人神之主本支百世共承宗廟之休臣
出守遠方阻觀盛禮會祠壇下莫睹燦然之光留滯周
南竊興命也之嘆

代滕達道湖州謝上表

郡壓五湖城交二水既先世舊居之地亦年少初仕之
邦父老縱觀不謂微臣之尚在吏民感涕共知洪造之

難酬

中謝

臣聞忠臣可使死封疆而不能受無根之謗

議志士本不求富貴而不能安有道之賤貧况臣早蒙
希世之恩常有捐軀之意豈容曖昧略不辨明然疑似
之難知實古今之通患漢文帝賢君也而不能信賈生
之屈尹吉甫慈父也而不能雪伯奇之冤此小人譖夫
所以得志而欺天忠臣孝子所以抱恨而入地况臣結
累朝之深怨無半面之先容而訴章朝聞恩詔夕下歷
數千載唯臣一人此蓋伏遇皇帝陛下妙揚言神思睿

作聖謂天蓋遠以窮呼而必聞如日之明雖浸潤而不
受念茲七年之阨收之九死之餘臣敢不更勵初心馴
據後效老當益壯未甘結草之幽途死且不辭尚欲據
鞍於前殿

同天節功德疏表

伏以累聖儲休上天垂佑乃逢純乾之月肇興出震之
祥恭惟皇帝陛下以堯舜生知之資承祖宗積治之慶
大有上古天人之助已明既醉太平聖賢之福誠備至

於臣子之私願是為草木之微情幸同海表之民共罄
封人之祝

上皇帝賀正表

東方發律氣迎萬物之新南面受圖禮勤三朝之始
惟聖時憲自天降康恭惟皇帝陛下文武生知聖神天
縱舊邦新命既先啓於前人大德小心以昭事於上帝
臣久塵從橐外領藩符敢傾葵藿之心仰獻松椿之壽

杭州賀冬表二首

月臨天統首冠於三冬氣應黃鍾復來於七日君道浸
長陽德光亨恭惟皇帝陛下清明在躬仁孝徧物垂衣
南面天何言而四時成問孝西清日將旦而群陰伏蠻
夷奔走年穀順成豈惟四海之歡心自識三靈之陰贊
臣祇膺詔命恪守郡符身雖在於江湖顏不忘於咫尺
敢同率土惟祝後天

又

消長有時候微陽之來復賢愚同慶知君子之彙征德

化所加神人並應恭惟太皇太后陛下睿明天縱慈儉
身先振海嶽以不傾地無私載順陰陽之自化天且不
違成功已陋於漢唐論德蓋高於任姒黃雲可望共沾
至治之祥彤史何知莫贊無為之德臣備員法從祇役
海隅東閣拜章阻陪於百辟南山獻壽徒頌於萬年

上皇帝賀冬表

易稱來復蓋知天地之心禮戒無為以待陰陽之定恭
惟皇帝陛下堯仁冠古舜孝通神種德兆民躬行文景

之儉游心六藝灼知周孔之情人既和而歲自豐天不
違而壽無極臣久緣衰病待罪江湖莫瞻北極之光但
罄南山之祝

上太皇太后賀正表

堯歷授時夏正建統氣迎交泰之會祥應重明之朝恭
惟太皇太后陛下道無能名德博而化天人所助本義
易之益謙慈儉不居得老氏之三寶時逢吉旦福集清
宮臣職守江湖心馳象魏天威咫尺想聞清蹕之音眉

壽萬年遠奉稱觴之慶

舉黃庭堅自代狀

蒙恩除臣翰林學士伏見某官黃某孝友之行追配古人瑰瑋之文妙絕當世舉以自代實允公議

英州謝上表

罪盈義絕誅九族以猶輕威震怒行真一州而大幸驚魂方散感涕徒零伏念臣草芥賤儒岷峨冷族襲先人之素業借一第以竊名雖幼歲勤勞實學聖人之道而

終身窮薄常為天下之罪人先帝念臣於衆怒必死之中陛下起臣於散官永棄之地恩深報蔑每憂天地之難欺福眇禍多是亦古今之罕有自悲棄物猶欲籲天惟上聖纂宗廟之圖方太母聽簾帷之政招延俊乂登進老成何期章句之謏才使掌絲綸之要職凡一時黜陟進退之衆皆兩宮威禍賞福之公既在代言敢思逃責苟不能敷揚上意尊朝廷於日月之明則何以聳動四方鼓號令於雷霆之震固當昭陳功罰直喻正邪豈

臣愚敢有於私心蓋王言不可以匿旨當時之天奪其
魄但謂守官今日之臣肆其言期於必戮賴父母之深
憫免子第之偕誅罪雖駭於聽聞怒終歸於寬宥不獨
再生於東市猶令尸祿於南州累歲寵榮固已太過此
時竄責誠所宜然瘡瘍炎馱去若清涼之地蒼顏素髮
誰憐衰暮之年恩重丘山感藏骨髓此蓋伏遇皇帝陛
下知惟天錫行自生知巍巍繼六聖之神休孜孜盡二
宮之孝養深原心迹曲示哀矜臣實何人恩常異衆在

先朝偶脫其誅戮故此日復煩於典刑頑戾如斯生存何面臣敢不噬臍悔過吞舌知非革再三不改之愆庶萬一善終之望殺身莫喻敢懷窮困之憂守土非輕尚畀遐荒之俗儻沐先朝之化永惟結草之忠臣無任

移廣州謝上表

使命遠臨初聞喪膽詔詞溫厚亟返驚魂拜望闕庭喜溢顏面否極泰遇雖物理之常然昔棄今收豈罪餘之敢望伏膺知幸揮涕無從中謝伏念臣頃以狂愚遽遭

譴責荷先帝之厚德寬蕭律之重誅投彼遐荒幸逃鼎鑊風波萬里歎衰病以何堪烟瘴五年賴喘息之猶在憐之者謂之已甚嫉之者恨其太輕考圖經止曰海隅其風土疑非人世食有併日衣無禦冬淒涼百端顛躓萬狀恍若醉夢已無意於生還豈謂優容許承恩而近徙雖云僥倖實有夤緣此蓋伏遇皇帝陛下道本生知性由天縱舊勞於外爰及小人之依堪家多艱鑒於先帝之德奉聖母之慈訓擇正人而與居凡有嘉謀出於

睿斷憫臣以孤忠援寡察臣以衆忌獲愆許以更新庶
使改過天地有造化之大不能使人之再生父母有鞠
育之恩不能全身於必死報期碎首言豈渝心濯於淤
泥已有遭逢之便擴開雲日復觀於變之時此生敢更
求榮處世但知緘默臣無任

謝復賜看墳寺表

名書罪籍慚負明時思念私塋特還舊刹九泉受賜荒
隴生光伏念臣早以空疎叨居近密始終無補愚不自

量恩禮誤加驟及既往一被黨人之目上遺先臣之憂
舊恩已移沒齒何覲豈謂詔書一出舊物復還山隴絕
芻牧之虞松檟變焦枯之色骨肉感涕里巷咨嗟伏遇
皇帝陛下性仁無私聖孝不匱覽二帝初潛之地動一
夫失所之懷號令所加存歿咸賴臣衰病已久報國之
日不長子孫在前教忠之心未替

東坡全集卷六十九

謹案卷六十八第六頁前一行更誓堅於晚節刊
本堅訛名據他本改

第九頁後七行帝生商而立子刊本生訛王據詩
經改

第二十頁後七行恐遂齋志而莫償刊本志訛至
今改

卷六十九第十八頁前六行與天同符刊本同訛
月今改

第二十四頁前七行魏魏繼六聖之神休刊本六

訛大據宋文鑑改

總校官庶吉士臣張能照

校對官庶吉士臣陳墉

謄錄監生臣張霖

欽定四庫全書薈要

集部

東坡全集卷

七十一

詳校官助教

臣常循



東坡全集卷七十

宋 蘇軾 撰

啓四十三首

謝館職啓

試言無取錫命過優進貽朋友之譏退有簡書之畏覲
顏就列撫已若驚國家取士之門至多而制舉號為首
冠育才之地非一而冊府處其最高觀其所以待之蓋
亦可謂至矣知寶玉璠璣難得而易毀故篋櫝以養其

全知梗楠豫章積歲而後成故封殖以待其長施等天
地恩均父師恭惟先帝臨御以來四十二載所擢賢良
方正之士十有五人其志莫不欲舉明主於三代之隆
其言莫不欲措天下於泰山之固大則欲興禮樂以範
來世小則欲操數術以馭四夷然而進有後先名有隱
顯命有窮達時有重輕或已踐廟堂之崇或已登侍從
之列或反流落於遠郡或尚滯留於小官或死生之乖
睽已為陳迹或擯斥於罪戾僅夷平民雖曰功名富貴

所由之塗亦為毀譽得喪必爭之地名重則於實難副
論高則與世常疎故雖絕異之資猶有不任之懼軾之
內顧豈不自知性任已以直前學師心而無法自始操
筆知不適時會宗伯之選掄疾時文之靡弊擢居異等
以風四方不知滿溢之憂復玷良能之舉負賢者所難
之任爭四海欲得之求其為蠢愚可為危慄是以一參
賓幕輒蹈危機已嘗名挂於深文不自意全於今日而
況大明繼照百度惟新理財訓兵有鞭笞戎狄之志信

賞必罰有追述祖宗之風凡用人歷試其能苟敗事必
誅無赦此太平可待之日豈不肖兼容之時而乃度越
賢豪曲收微賤縱不能力辭而就下亦當知非分以自
慙此蓋伏遇某官志在斯民仁為己任欲辦大事務兼
寸尺之長將求多聞故引涓埃之助致此忝冒有踰等
倫欲報無緣將何望於頑鄙遇寵知懼庶不至於情媮
賀韓丞相啓

右軾啓伏審誕膺策命首冠輔臣四方聳觀萬口同慶

天下幸甚天下幸甚自古在昔治少亂多夫天將欲措
世於大安必有異人之間出使民莫不同心而向道類
非俗吏之所能方陋漢唐將追堯舜洪惟上聖之后眷
求一德之臣謂莫如公遂授以政付八音於師曠孰敢
爭能捐六轡於王良坐將致遠引領以望惟日為年恭
以昭文相公全德難名巨才不器疊疊申伯之望堂堂
漢相之風出入三朝險夷一節叢爾種羌之叛命慨然
當寧以請行威聲所加臙穢自屏淮蔡既定而裴度相

徐方不同而召虎歸縱復遺種龍荒遊魂沙海譬之癰
疥豈足爬搔必將訓兵擇帥而授之規摹積穀堅城而
磨以歲月破斧之惡四國實願周公之亟還折箠以鞭
赤眉無煩鄧禹之久外天下是望豈惟一人即日邊徼
苦寒台候何似伏冀為國善調寢興謹奉啓起居

答曾學士啓

伏審祇奉詔恩榮升冊府允厭朝論增輝士林伏惟慶
慰恭以聖神在御政化惟新顧顧俊之無方豈拔賢而

待次賤如莘野猶為席上之珍遠若傅巖盡入彀中之選而況圭璋之質近生閥閱之家固宜首膺寤寐之求於以助成肅雍之化府判學士天資粹美儒術講明向屈處於下僚蓋避嫌而自晦屬文子之請老察少翁之最賢撫念老成聿求義訓豈獨褒崇之盛典固將樂育於英材自顧庸虛獲聯齋舍忽捧書詞之辱益知謙德之光喜愧于心踧踖無措

賀歐陽少師致仕啓

伏審抗章得謝釋位言還天眷雖隆莫奪已行之志士
流太息其高難繼之風凡在庇庥共增慶慰伏以懷安
天下之公患去就君子之所難世靡不知人更相笑而
道不勝欲私於為身君臣之恩係縻之於前妻子之計
推荷之於後至於山林之士猶有降志於垂老而況廟
堂之舊欲使辭福於當年有其言而無其心有其心而
無其決愚智共蔽古今一塗是以用捨行藏仲尼獨許
於顏子存亡進退周易不及於賢人自非智足以周知

仁足以自愛道足以忘物之得喪志足以一氣之盛衰
則孰能見幾禍福之先脫屣塵垢之外常恐茲世不見
其人伏惟致政觀文少師全德難名巨材不器事業三
朝之望文章百世之師功存社稷而人不知躬履艱難
而節乃見縱使耄期篤老猶當就見質疑而乃力辭於
未及之年退託以不能而止大勇若怯大智如愚至貴
無軒冕而榮至仁不導引而壽較其所得孰與昔多軾
受知最深聞道有自雖外為天下惜老成之去而私喜

明哲得保身之全伏暑向闌台候何似伏冀為時自重
少慰輿情

賀韓丞相再入啓

伏覩詔書登庸舊德傳聞四海歡喜一辭竊以君臣之
間古今異道任法而不任人則責輕而憂淺庸人之所
安任人而不任法則責重而憂深賢者之所樂凡吾君
所以推心忘己一切不問而聽其所為蓋其後必將責
報收功三年有成而底於至治自非量足以容物智足

以知人強足以濟艱難勇足以斷取舍則何以首膺民
望力報主知恭惟史館相公忠誠在天德望冠世如乾
之中正挺然而純粹精如坤之六二隤然而直方大更
練三朝之用舍出入四方之險夷疲民系心有識引領
必將發其蘊蓄以次施行始緩獄以裕民終措刑而隆
禮貳登門最舊荷顧亦深喜忭之懷實倍倫等

密州到任謝執政啓

蒙恩授前件差遣已於今月三日赴任訖帶山負海號

為持節之邦多病無功久在散材之目授非所稱愧靡
自任矧茲願治之辰方以求賢為急宜得敏銳兼人
之器以副屬精更化之懷如軾者天與愚忠家傳朴學
議論止於汙俗交遊謂之陳人出佐郡條存更歲齋雖
僅脫網羅之患然卒無毫髮之稱豈伊寵榮偶及衰鈍
此蓋伏遇某官股肱元聖師表萬邦欲隆太平極治之
風故開兼收並採之路重使一夫之不獲特捐支郡以
見收荷恩至深論報何所謹當鐫磨朽鈍筆策疲篤雖

無望於功名庶少逃於罪戾過此以往未知所裁

答楊屯田啓二首

伏承枉顧寵示長書禮數過隆既匪安庸之稱文詞深厚足為衰拙之光反復究觀愧汗交集伏惟通判屯田學深經術名重薦紳頃者劔外屈臨百里之間已是部中受賜一人之數豈伊幸會復此逢迎聽其言信仁人之溥哉居是邦蓋大夫之賢者欲報瓊瑤之貺適苦簿書之煩言之不文永以為好

又

向者不遺特蒙枉顧愧無琴瑟旨酒以樂我嘉賓但喜
直亮多聞真古之益友謂將繼此而得見豈意闕然而
有行伏讀誨音惟知感歎伏惟通判屯田才猷通敏學
術深純非獨東州杞梓之珍將為清廟璠璣之寶暫臨
邊服行履要津而軾早以空疎加之衰病不緣曠官而
罷去則當引分以歸耕自茲恐遂有出處之疎故臨紙
不能無悵惘之意惟祈自重少副下情

謝監司薦舉啓

猥以庸虛過蒙知遇既免尤譴復加薦論自省孤危加之衰病生而賦補野之性愚不識禍福之機但知任已以直前不復周防而慮後動觸時忌言為身災擠而去之則為有功引而進之亦或招悔自非不利祿為意而以仁厚為心顧茲鈍頑誰肯收錄伏惟某官時望至重主知已深方將長育於羣材專務掩覆於小過憐其謀身之甚拙進絕望而退無歸知其為政之雖迂歲有

餘而日不足特矯世俗借之齒牙軾敢不祇畏簡書益
自脩飭豈云報德苟不辱知過此以還未知所措

徐州謝兩府啓

移守河中已愧超陞之異改臨泗上仍叨藩鎮之雄既
見吏民周覽風俗地形襟要當東南水陸之衝民食艱
難正春夏旱蝗之際宜得一時之循吏以安千里之疲
民如軾者才不逮人學非適用冒塵策府自知拙直之
難安屢乞守符意謂苟全之善計然自往來三郡首尾

七年足蹈危機僅脫風波之險心存吏役都忘學術之
源既未決於歸耕敢復求於善地伏遇某官權衡萬物
高下一心頑礦悍堅實費陶鎔之力散材疎惡徒施封
殖之恩謹當箠策疲駑鋸磨朽鈍上酬天造次答已知

賀呂副樞啓

伏審近膺告命入總樞機中外聳觀朝廷增重伏惟慶
慰竊以古之為國權在用人德厚者輔其才而名益隆
望重者無所為而人自服是以淮南叛國先止謀於長

孺汾陽元老尚改觀於公權樽俎可以折衝藜藿為之
不採哀此風流之莫繼久矣寂寥而無聞天亦厭於凡
才上復思於舊德恭惟樞密侍郎性資仁義世濟忠嘉
豈惟清節以鎮浮固已直言而中病出領數郡若將終
身小人謂之失時君子意其復用迨茲顯拜夫豈偶然
然而荷三朝兩世之恩當春秋賢者之責推之不去凜
乎其難進伯玉而退子瑕人皆望於門下烹桑羊而斬
樊噲公無愧於古人莫若盡行疇昔之言庶幾大慰天

下之望軾登門最舊稱慶無緣踴躍之懷實倍倫等

賀趙大資致仕啓

伏審抗章得謝奉冊言還指紳聳觀閭里相慶竊謂富貴不為至樂功名非有甚難樂莫樂於還故鄉難莫難於全大節歷數當今之卿相或寓他邦究觀自古之忠賢少有完傳錦衣而夜行者多矣狐裘而羔袖者有之至若百行渾圓五福純備當世所羨非公而誰恭惟致政大資少保道心精微德望宏遠無施不可尤高臺諫

之風所臨有聲最宜吳蜀之政才不究於大用命乃係
於生民與時偕行不可則止見故人而一笑綽有餘歡
念平生之百為一無可恨方將深入不二獨遊無何默
追築可之風坐致喬松之壽軾荷知有素貪祿忘歸慕
鸞鵠之高翔眷樊籠而永歎傾頌之素數寫莫窮

答陳齋郎啓

伏審祇膺寵命榮踐亨塗拜慶庭闈溢歡聲於觀者馳
書士友挾華藻之燦然顧此衰羸實難當捧伏惟齋郎

天資深茂學術淹通經行兩純窮達一操久困有司之
尺度退從老圃於丘園陋彼素食是聞也非達也凜然
遺直惟有之則似之假道一官權輿千里幅巾藜杖願
為二老之風流甲第高門坐看諸郎之富貴欣頌之至
筆舌難周

賀文太尉啓

伏審字號揚庭臨軒遣使出節少府授鉞齋壇夷夏聳
觀兵民交慶蓋功業盛大則極名器而後稱惟德度宏

遠故舉富貴而若無爵為三世之宗臣豈獨一時之盛
事恭惟留守太尉丈丈道本天合德為人師信及二川之
豚魚威加兩河之草木身任休戚言為重輕始若留侯
弱冠而遇高祖晚同父黃髮而亮武王既奉冊書益
新民聽方將威懷北虜係頸長纓約束河公軌流故道
然後入調伊傳之鼎歸躡松喬之海輿論所期斯言可
必軾謫官有限趨侍無緣踴躍之心宣寫難盡

登州謝兩府啓

右軾啟蒙恩授前件官已於今月十五日到任上訖者
迂愚之守沒齒不移廢逐之餘歸田已幸豈謂承宣之
寄忽為枯朽之榮眷此東州下臨北徼俗習齊魯之厚
迹皆秦漢之陳賔出日於麗譙山川炳煥傳夕烽於海
嶠鼓角清閒顧靜樂之難名笑妄庸之竊據此蓋伏遇
某官股肱元聖師保萬民才全而德不形任重而道愈
遠謂使功不如使過而觀過足以知仁特借齒牙曲成
羽翼軾敢不服勤簿領祇畏簡書策蹇磨鉛少答非常

之遇息黜補劓漸收無用之身過此以還未知所措

謝中書舍人啟

右軾啓蒙恩授前件官者起於貶所未及暮年擢置周
行遽叅法從省躬無有被寵若驚竊惟人材進退之間
實為風俗隆替之漸必欲致治在於積賢雖一薛居州
齊言不能移楚而用范武子晉盜可使奔秦崔琰進而
廉儉成風楊綰用而淫侈改度誠國是之先定雖民散
而可收拔茅茹者以彙而征附焉棧者必先其直用舍

既見好惡自明人知所趨勢有必至今朝廷方講當世之務力追前代之隆雖改定法令足以便事而未足以安民寬弛賦役足以安民而未足以成俗是以登進耆老搜求雋良將使士知向方民亦有恥如軾者山林下士軒冕棄材少而學文本聲律雕蟲之技出而從仕有狂捐嬰鱗之愚溝中不顧於青黃纍下無心於宮徵誤蒙收拾已出優恩荐履禁嚴殊非素望此蓋伏遇某官德配前哲望隆本朝名重圭璋上助廟堂之用言為著

蔡下同卿士之謀餘論所加虛名增重知丹心之尚在
憐白首之無歸特借寵光以寬衰病任隆才下恩重報
輕直道而行恐非所以安愚不肖之分充位而已又不
足以解卿大夫之憂蚤夜以思進退惟谷恐懼戰越不
知所裁

謝翰林學士啟

叨奉寵恩擢居禁近任逾器表憂與愧并內自顧於衰
遲宜退安於冗散豈期晚節復與英遊此蓋伏遇某官

德配先民望隆多士至誠樂與共推人物之評雅量兼
容曲借齒牙之未致茲朽鈍亦踐高華方脩問之未皇
遽移書之見及其為感佩難盡敷陳

答試館職人啓

伏承射策玉堂方觀筆陣校文天祿遂秀儒林黨友增
華縉紳共慶國家求賢之道必於閒暇無事之時賢者
報國之功乃在緩急有為之際養之無素則一旦欲用
而何由待以非常則臨事欲辭而不可故納之於英俊

相從之地觀之以世俗不見之書非獨使之業廣而材
成抑將待其資深而望重某官學優而仕行浮於名詞
令從容議論慷慨追還正始文章為之一新傳寫都城
紙墨幾於驟貴得士之喜非我敢私軾衰病侵尋文思
荒落職在翰苑當發策而莫辭識匪通儒懼品藻之不
稱過煩臨貺寵以書詞永為巾笥之珍愧乏瓊瑶之報

答李寶文啓

伏審祇奉異恩遠臨全蜀奎文寶訓方入直於禁嚴井

絡提封旋出分於憂顧風猷所暨謠頌率同恭惟知府
寶文望重搢紳材宜廊廟譬之金石蓋闇然而日彰浩
若江河固窮之而益遠西南之俗信服已深民物子來
氣復岷峨之舊舟車雲集惠通秦楚之商曾未下車已
聞報政軼倦游滋久寤寐懷歸空詠甘棠之思莫展維
桑之敬悵焉永望言不寫心

答王欽臣啓

伏審祇奉明綍特膺異選以高才望冊府以令德正僕

臣側聞除書大慰輿論伏惟太僕學士文鳴早歲學配
前人豫章雖老於中林瑚璉終升於清廟萬事不理問
伯始而可知三篋雖亡得安世而何患清塗方踐遠業
難量愧脩慶之未皇辱移書之見及感佩之至但切下
懷

答彭舍人啓

伏審顯膺宸命進直掖垣除目播騰輿情欣屬國家董
正百官之治聿追三代之隆用事考言因名責實然而

憲臺省閫無預於文詞儒館學宮不關於政理惟此六

押之任要須二者之長非該通經術則不足以代王言
非曉達吏方則不足以分省事是為文士之極任豈止
時人之美談果有真才來應妙選伏惟某官道師古始
識造精微學窮游夏之淵源文列馬班之伯仲自期甚
厚所得寔多射策決科嘗魁天下之士犯顏逆指有古
名臣之風粵從言動之司亟掌絲綸之美璠璣美質豈
獨一時宗廟之華杞梓異材固為後日棟梁之用軾備

員法從竊庇餘光聊陳輿誦之言少答函封之辱其為
欣佩莫究頌言

謝賈朝奉啓

右軾啓自蜀徂京幾四千里携孥去國蓋二十年側聞
松楸已中梁柱過而下馬空瞻董相之陵酹以隻鷄誰
副橋公之約宦游歲晚坐念涕流未報不貲之恩敢懷
盍歸之意常恐樵牧不禁行有雍門之悲雨露既濡空
引太行之望豈謂通判某官政先慈孝義篤友朋首隆

學校之師儒次訪里閭之耆舊自嗟來暮不聞拔薤之規
尚意神交特致生芻之奠父老感歎桑梓光華深衣練
冠莫克垂洟於墓道昔襦今袴尚能鼓舞於民謠仰佩
之深力占難盡

賀范端明啓

右軾啓恭承明詔追錄舊勲名陞祕殿之嚴實遂安車
之養仍推餘澤以及後昆聞命以還有識相慶竊謂死
生之事聖賢有不能了父子之際古今以為難言方其

犯雷霆於一時豈意收功名於今日惟天知我絕口不
言偉事發之相重非人謀之所及恭惟致政端明學士
至誠格物隱德在人弼亮四世如畢公壽考百年如衛
武獨立不懼舍之則藏惟有青蒲之言尚在金縢之匱
白日一照浮雲自開坐使遺民復觀盛事子孫歸沐下
萬石之里門君相乞言授三老之几杖更延眉壽永作
元龜軾無任歡喜頌詠激切之至

答范端明啓

伏審參稽古樂追述新書琢石鑄金成之有數立均出
度施及無窮措紳雲集於奉常端冕天臨於便座偉茲
壯觀自我元臣竊以樂之盛衰寄於人之存否秦漢以
下鄭衛肆行雖喜三雍之成旋遘五胡之亂平陳之後
粗獲雅音天寶之中遂雜胡部道喪久矣孰能起之獨
求三代之遺聲允屬四朝之舊德恭惟致政端明文丈
耄期稱道直亮多聞進不謀安昔既以身而殉義退猶
憂國今推所學以及人豈惟盡力於考音至復傾家而

制器蓋事關於治忽必幽贊於神明得商頌十二篇於周太師雖賢者之事也獲古磬十六枚於捷為郡豈偶然而已哉軾本非知音之人空荷移書之辱究觀累日喜愧兼懷徒誦詠於再三豈發明於萬一

杭州謝執政啓

右軾啓小器易盈宜處不爭之地大恩難報終為有愧之人到郡浹旬汗顏數四湖山如舊魚鳥亦怪其衰殘爭訟稍稀吏民習知其遲鈍雖尚嬰於寵劇庶漸即於

安閒顧此蠢愚亦蒙微倖此蓋伏遇某官輔世以德事
君以仁嘉善而矜不能與人不求其備故令狂直得保
始終措步武於夷途收桑榆之暮景軾敢不欽承令德
推本上心政拙催科自占陽城之考姦容獄市敢師齊
相之言庶寡悔尤少償知遇

荅杭州交代啓

右軾啓罷直禁中本緣衰病分符浙右更竊寵榮既尋
少壯之舊遊復繼老成之前躅養痾卧治之所蒙成坐

嘯之餘顧此鈍頑實為忝昧伏惟知府待制宏才緯俗
雅望鎮浮神馳方切於望塵心照已先於傾蓋借之餘
潤成此虛名滕大夫之才豈堪治劇楚令尹之政或許
告新望見有期瞻依愈切

答莫提刑啟

右軾啓得請江湖雖適平生之願剗煩獄市豈堪老病
之餘賴茲德大而有容愍其心勞而愈拙故於始至借
以一言此蓋伏遇提刑某官威肅列城德懷雅俗雖在

按臨之屬部不忘宿昔之交情豈獨敦忠厚之風抑以
增衰朽之重其為感忤未易名言

答王明州啓

伏審奉詔牧民涓辰莅事教條清簡曾無顧指之勞吏
下肅承皆有心服之敬風聲所暨隣境為先伏惟知府
龍圖迪哲而文剛中莫屈大辯若訥耻為利口之言小
智自私誰識仁人之勇道不容於羣枉身乃獲於退安
回觀爭奪之塗日有榮枯之變坐嘯之樂勿以語人強

食自頤猶當為國

謝生日詩啓

蓬天之祥雖世俗之所尚
蓼莪之感迨衰老而不忘
豈謂某官意重瓊瑤文成黼黻
推仁心而錫類出妙語以
噓枯攝提正於孟陬已光初度
月宿直於南斗更借虛
名永惟難報之珍但結無窮之好

賀林待制啓

伏審圖舊聖時陞華法從僉言諧允有識歎咨萬木歲

寒配喬松於巨栢衆星夜艾凜明月與長庚斧藻昌朝
領袖後進傳聞四遠歡喜一詞恭惟某官名重弱齡望
高晚節文章爾雅蓋西漢之餘風悃悃無華亦東京之
循吏凡閱四朝而後用獨為三館之老臣著書已成特
未寫之琬琰立功何晚會當收之桑榆軼交舊最深慰
喜良甚尺書為賀鄙志莫宣

賀蔣發運啓

伏審上計入覲拜恩言還擁節東南上寄一方之休戚

考圖廣內示將大用之權輿九在庇庥舉增忤躍恭惟
某官受材秀傑秉德純忠蔚然西漢之文深厚爾雅展
矣東京之吏悃悃無華雖已得正法眼藏於大祖師猶
有一大事因緣於當來世固將入踐卿相坐致功名以
斯道而結主知隨所寓而作佛事某竄流已久衰病相
仍方稱慶之未皇忽移書之見及欣感之幸筆舌難宣
謝制科啓

右軾啓今月某日蒙恩授前件官者臨軒策士方搜絕

異之材隨問獻言誤占久虛之等忽從佐縣擢與評刑
內自顧於無堪凜不知其所措恭惟制治之要惟有取
人之難用法者畏有司之不公故舍其平生而論其一
日通變者恐人才之未盡故詳於採聽而略於臨時茲
二者之相形顧兩全而未有一之於考試而掩之於倉
卒所以為無私也然而才行之迹無由而深知委之於
察舉而要之於久長所以為無失也然而請屬之風或
因而滋長此隋唐進士之所以為有弊魏晉中正之所

以為多姦惟是賢良茂異之科兼用考試察舉之法每
中年輒下明詔使兩制各舉所聞在家者能孝而恭在
官者能廉而慎臨之以惠難而能不變邀之以寵利而
能不回既已得其行已之大方然後責其當世之要用
學博者又須守約而後取文麗者或以用寡而見尤特
於萬人之中求其百全之美凡與中書之召命已為天
下之選人而又有不可測知之論以觀其默識之能無
所不問之策以致其博通之實至於此而不去則其人

之可知然猶使御史得以求其疵諫官得以考其素一
陷清議輒為廢人是以始由察舉而無請謁公行之私
終用考試而無倉卒不審之患蓋其取人也如此之密
則夫不肖者安得而容軾才不迫人少而自信治經獨
傳於家學為文不願於世知特以饑寒之憂出求斗升
之祿不謂諸公之過聽使與羣豪而並遊始不自量欲
行其志遂竊俊良之舉不知氣力之微論事迂闊而不
能動人讀書疎略而無以應敵取之甚愧得而益慙此

蓋伏遇某官德為世之望人位為時之顯處聲稱所被
四方莫不奔趨議論一加多士以為進退致茲庸末亦
與甄收然而志卑處高德薄寵厚歷觀前輩由此為致
君之資敢以微軀自今為許國之始過此以往未知所
裁

賀楊龍圖啓

右軾啓伏審新改直職擢司諫垣傳聞邇遐竦動觀聽
咸謂國家之鉅福乃用諫諍之真才必能深言以補大

化方今朝廷之上號為無諱而太平之美終不能全臺
諫之列歲不乏人而衆弊之原猶或未去豈聽之者徒
能容而不能用言之者但為名而不為功歷觀古人之
效忠皆因當世而用智不務過直期於必行右尹子革
因墳典而道祈招之詩左師觸龍語饁粥而及長安之
質徒盡拳拳之意不求赫赫之名此仁人及物之休功
忠臣愛君之至分伏自頃歲所更幾人席未暖而輒遷
踵相躡而繼去一身之譏固足以免矣而積歲之病當

使誰去之恐習慣以為常遂因循而不振雖在僻陋顧
常隱憂以為必得朴忠憂國之人而又加以辯智得君
之術言苟獲用國其庶幾伏惟諫院龍圖才雄於世而
常若不勝節過於人而未嘗自異素練邊事深知兵騎
頃持銓衡實識官冗必將舉大體而不論小事務實效
而不為虛名軾最蒙深知愧無少補方傾耳以聽願續
書諫苑之篇若有待而言或能著爭臣之論阻以在外
無由至門踊躍之懷實倍倫等

鳳翔到任謝執政啓

右軾啓違去軒屏忽已改歲向風瞻戀何翅饑渴前月
十四日到任翌日尋已交割訖軾本九材繆承選取忽
從州縣便與賓佐捫躬自省豈不媿幸伏自到任已來
日夜厲精雖無過人底幾寡過伏惟昭文相公素所獎
庇曲加搜揚既蒙最深之知遂有自重之意所任僉署
一局兼掌五曹文書內有衙司最為要事編木棧竹東
下河渭飛芻輓粟西赴邊陲大河有每歲之防販務有

不蠲之課破蕩民業忽如春冰于今雖有優輕酬獎之名其實不及所費百分之一救之無術坐以自慙惟有署置之必均姑使服勞而無怨過此以往未知所裁

賀吳副樞啓

頃聞休命擢領上都曾安坐之未皇已歡聲之布出即欲裁問少通勤拳以為不久當有非常之聞是以未敢輕為率爾之賀逮茲未幾果已如言釋府事之喧繁總兵權於禁密傳聞四遠歡喜一詞伏惟某官機略足以

應無方而有朴忠沉厚之量文華足以表當世而有簡
素質直之風置之於都會則其為效也速而所及者廉
委之於樞機則其成功也遲而所被者廣深惟賢者之
處世皆以得時為至難幸而得之或已老矣今以明公
之至盛正如大川之方增天下方將以未獲之事盡付
於明公明公宜愛此不貲之軀以畢其能事區區之意
言不能勝

答許狀元啓

右軾啓伏以賢俊之士固將有以挾持富貴之來豈能
為之損益昔者在貧賤之辱所有無以異於今一朝居
豪傑之先而人然後知其貴伏惟狀元僉判廷評以粹
美之質負傑異之才自遠方而遊上都以一日而蓋天
下士既望風而知不敵人皆歛衽而謂當然苟非素與
交遊之流安敢輕為賀問之禮不期謙抑過錄庸虛忽
承賤牘之臨皆自聽聞之誤禮非所稱媿靡自任先皇
帝未明求衣久已格於至治兆盥憑几尚不忘於選賢

庸登哲民以遺後聖雖喜車旌之召旋興弓劍之悲臣
子之心遠邇若一即日承已拜命計將就塗念展謁之
何時徒向風而永望謹奉啓陳謝不宣

謝秋賦試官啓

伏以聖人設文章之教本以御民君子在野田之間亦
學為政故知禮樂者可與言化通春秋者長於治人蓋
三代之所常行於六經可以備見事為之制曲為之防
使學者皆能明其心則天下可以運諸掌降及近世析

為二塗九王政皆出於刑書故儒術不通於吏事惟其所以治民者固不本於學而其所以為學者亦無施於民遊庠校者忘朝廷讀法律者捐詩賦場屋後進挾聲技以相夸王公大人顧雕蟲而自笑舊學無用古風遂忘終始之意曾不相公貴賤之間亦因遂闕下之士有學古之志而無學古之功上之人有用儒之名而無用儒之實顧茲媮弊常竊憫嗟苟非當世之大賢孰拯先王之墜典伏惟某官才出間世志存生民曩在布衣能

通天下之務旋居要職又為儒者之宗明習政事而皆
有本原守持經術而不為迂闊世之系望上所深知輟
自朝聯付之文柄命題甚易而不肖者無所兼容用法
至寬而犯令者未嘗苟免觀其發問於策足以盡人之
材講求先聖之心考其詩義深悲古學之廢訊以厯書
條任子之便宜訪成均之故事不泥於古不牽於今非
有苛碎難知之文將觀磊落不羈之士使天下知文章
誠可以制治知聲律不足以入官失之者固因而自新

得之者不至於捐舊疇昔所欲於今遂忘軾才無他長
學以自守為文病拙不能當世俗之心奏籍有名大懼
辱賢材之舉翻然如界之羽翼追逸翮以並遊沛然如
假之舟航臨長川而獲濟偶緣大庇粗遂一名方將區
區於簿書米鹽之間碌碌於塵埃簞楚之地雖識恩之
所自顧力報之末由感懼之懷不知所措

謝韓舍人啓

右軾啓軾聞古者至治之世天子推恩以收天下之望

有司執法以繩天下之媮蓋不推恩則無所兼容不執法則有所僥倖有司推恩而求名則侵君之權天子執法而責實則失民之望為君者常病於察為臣者又失之寬古之明天子信其臣而不惑於多言故有司執法而無所忌古之良有司憂其君而不卹於私計故天下歸怨而不敢辭况欲選材而置官是將教民而圖任唯所利國豈容樹恩今聖上推不忍之心使賢愚皆遂其所欲而大臣用至明之法使工拙不至於相淆嚮者哀

憐老儒故為特奏之令憫惻連坐又開別試之塗此天下所以詠歌至仁鼓舞盛德君臣之體夫豈同條伏惟舍人執事為時求材憂國忘已所圖甚遠將深計於安危自信至明曾不牽於毀譽變苟且依違之俗去浮偽囂譁之文罷黜俗儒動以千計講通經術得者九人顧茲小才偶在殊選惟天子推恩如此之厚惟大臣執法如此之堅將天下實被其休功豈一夫獨遂其私願感荷激切不能自勝

謝王內翰啟

右軾啟竊以取士之道古難其全欲求侔儻超拔之才
則懼其放蕩而或至於無度欲求規矩尺寸之士則病
其齷齪而不能有所為進士之科昔稱浮剽本朝更制
漸復古風博觀策論以開天下豪俊之塗精取詩賦以
折天下英雄之氣使齷齪者望而不敢進放蕩者退而
有所裁此聖人所以罔羅天下之逸民追復先王之舊
迹元臣大老皆出此塗伏惟內翰執事天材俊麗神氣

橫溢奇文高論大或出於繩檢比聲協句小亦合於方
圓蓋天下望為權衡故明主委之黜陟軾之不肖與在
下風顧惟山野之見聞安識朝廷之忌諱軾亦特有執
事之英鑒以為小節之何拘執事亦將收天下之遺才
觀其大綱之所在驟置殊等寔聞四方使知大國之選
材非顧當時之所悅眇然陋器雖不能勝多士之喧言
卓爾大賢自足以破萬人之浮議方將奔走厥職厲精
乃心苟庶幾無朝夕之愆以辱知己亦萬一有毛髮之

效少荅至仁感懼之懷不知所措

潁州到任謝執政啟

入叅兩禁每玷北扉之榮出典二邦輒為西湖之長皆
緣天幸豈復人謀惟汝水之名邦乃裕陵之故國人醇
事簡地壤泉甘豈惟暫養於不才抑亦此生之可老恭
惟某官嘉猷經世茂德範時元老廟堂自有權衡之信
餘生江海得同品物之安感佩之私筆舌難既

定州到任謝執政啟

燕南趙北昔稱謀帥之難尺短寸長今以乏人而授幸
此四夷之守忘其一障之乘坐食何功捫心知愧伏念
軾愚忠自信朴學無華孔融意廣才疎訖無成効嵇康
性褊傷物頗致怨憎叨逢聖世之休明未分昔人之憂
患故求散地以養衰年終成命之莫回悼此心之未亮
伏惟某官躬行周孔力致唐虞燮和天人方遂萬物之
性虛受海宇固容一介之微眷此餘生實無他望老如
安國既倦北平之遷憊北方回終有會稽之請歸依之

至筆舌奚周

上執政謝獎諭啓

事有服勤此實守臣之職功無可錄遽膺褒詔之榮聞
命惟驚反身自愧伏自河失故道遺患及於東方徐居
下流受害甲於他郡比緣衆力獲保孤城灑沈澹災無
補洪源之塞增卑培薄僅循下策之施敢圖天聽之卑
乃辱璽書之賜茲蓋伏遇某官左右元聖師保萬民方
以一夫不獲為己羞故衆人皆樂以善告遂緣過聽致

此曲恩某敢不祇服訓詞益脩吏職深自策其鶩鈍庶
有補於涓埃過此以還罔知所措

上留守宣徽啓

右某啓少年游學方成都樂職之秋壯歲效官復淮陽
卧理之日矧留都之清淨眷懷府之優閒再枉辟書重
收孤迹哀憐廢棄之久誰復肯然綢繆樽俎之歡亦非
偶爾伏惟留守宣徽太尉才高一世望重屢朝體河嶽
之兼容納涓塵而不間衣食有奉已寬盡室之憂道德

照人況復終身之幸其為感激難盡敷陳

東坡全集卷七十